



邦畿水利集說

卷三卷四
附定考



邦畿水利集說目錄

卷之三

永定河

灤水

桑乾水

恢河

西三水係來源俱在山

鄗河

新庄子河

復宿山水

木瓜河

磨道河

清水河

鹽鹹二河

里八庄河

渾源河

大峪口河

如渾水

五泉河

石門溝水

以上諸水係在山西會流

柳園泉

西沙河

壺流河

南洋河



西洋河 東洋河 溫涼泉 清水河

拜察河 西海子水 小清河水 泥河

燕尾河 東礮山水 望聖山水 媯河

溪河 大柳河 黑龍河 小清河

小溪水 以上諸水係在直境會流

金門閘減河 北村灰壩減河

求賢灰壩減河

唐河

恒水 清水河 盧奴水 狄水河

龍泉河 馬溺河 鴻上水 灣里河

古洋河

沙河

郃河 甘泉河

滋河

漳河

小漳 石猴嶺水 清河 洵清河

石子河 龍泗河 洺水 蘭水

丹朱嶺水 沙河 張甲河

衛河

淇水 湯水 洹水 濟水

四水俱在河南

汶水 發源山東

邦畿水利集說卷三

元和沈聯芳叢山編輯

永定河

永定河本名盧溝河古謂之無定河桑乾河之
下游也以其水挾沙而行又謂之渾河康熙三
十七年

聖祖仁皇帝親臨查閱

錫名永定建隄設官無復漫行為患然河水挾沙壅泥

易淤善徙遼宋以前河在京北元明以後河在

京南康熙三十九年以後河由柳岔口直入東
淀至

世宗初年淀池受淤

憲皇帝特頒

諭

旨令引渾河別由一道改由柳岔口稍北東入三角
淀嗣因三角淀又復淤平乾隆二十年於北岸
六工二十號改為下口流入沙家淀會鳳河入
大清河北今昔河流改道之大較也以今輿地
考之其源有三一為灤水即治水亦曰黃道泉

又曰洪濤泉一為潦涓水即桑乾水桑椹熟時河中乾涸

故一為灰河一作水經注所謂馬邑川水也三

水會流於馬邑縣西南而東注流逕寧武大同

二府境內凡馬邑縣朔州山陰縣懷仁縣應州

渾源州左雲縣大同縣察哈爾豐鎮廳等處之

水羣匯於天鎮縣而入直隸西寧縣界自下通

謂之桑乾河其流入直隸境也盤旋於宣化府

境內至保安州而東會清水河又北會洋河其

源更大洋河有南西東三派南洋河即古雁門

水也西洋河即古延鄉水也東洋河即古修水也水經注謂之于延水三派會流於懷安縣境合桑乾河逕宣化懷來界至北金溝南流至石景山繞山之西麓西南流約三十里出盧溝橋為求定河

明史桑乾河穿西山入宛平縣東南至香丹口分為二其一東由通州高麗莊入白河其一南流霸州合易水南至天津丁字沽入漕河今俱成故道

自盧溝

橋而下兩岸魏隄岨峙築自康熙三十七年上自橋之南北起建石隄下遂接築土隄至五工而止其間建減水壩三一為金門石壩一為北

村灰壩一為求賢灰壩至三十九年改河至柳岔口又接築東西隄雍正四年復改河築隄至王慶坨引河入三角淀乾隆二十年於北岸六工改下口使河流東入沙家淀而以南北兩壔為下口關束自是而下會鳳河入大清河以入海四十餘年以來俱循是道惟歷年既久南淤則水北漾北淤則水南漾向之所謂窪下之區今俱淤成平陸昔之所藉以蕩漾勻沙者今已無地可容下口日淤日高則上游沙停不下河

底亦隨之而高使僅於上游隄工加培高厚是
豈萬金之計哉蓋永定河俗謂之小黃河其未
有隄岸之先京南如良鄉之廣陽河宛平之盭
溝河涿州之巨馬河胡良河房山之琉璃河皆
入焉自築隄之後各河自為經流永定已無旁
入之水而復留三壩以分減盛漲治法可謂大
備今下口遙捨之中俱已淤為平地咽喉受病
胸膈不舒此非另闢一塗為久長之計恐築隄
去淤徒糜帑項無補于事也

來源三水

灤水 說文灤水出雁門陰館縣累頭山漢書地
理志雁門郡陰館縣累頭山治水所出東至泉
州入海過郡行千一百里水經注灤水一曰治
水泉發於山側沿坡歷澗東北流出山逕陰館
縣故城西又東北流合桑乾水馬邑縣志黃道
泉即灤水導源縣西北十里雷川側之洪濤山
亦曰洪濤泉

桑乾水 馬邑縣志天池伏流至縣雷山之陽匯

為七泉曰上源曰玉泉曰三泉曰司馬洪濤曰
金龍池曰小盧曰小泊七泉合而為一是為桑
乾又桑乾發源於黃道泉金龍池二水合流至
縣會西來之恢河始名桑乾河

恢河 一統志恢河在朔州西南自寧武縣流入
又北至馬邑縣南入桑乾河即古馬邑川發源
寧武縣西南六十里管涔山之分水嶺嶺西為
汾水嶺東為恢河源流逕朔州吁澗水臘河嘯
河沙楞河七里河皆入焉

在山西會流諸水

鄆河 一名黃水河大同府志源出朔州東南之
三泉流逕辛村一曰元英村寢散亂復聚於黑圪塔
即水經注所稱桑乾枝津也一統志鄆河在朔
州東東流入馬邑縣界入桑乾河

新庄子河 源出懷仁縣南新庄子村西南流逕
黃花岡出大于口入山陰縣東南入桑乾河黃花

岡即水經注云黃瓜阜也大同府志古名黃瓜
堆後訛瓜為花又稱黃阜黃花嶺今在應州北
四十里

復宿山水 即水經注夏屋山水大同府志在山

陰縣北流逕應州師家坊入桑乾河

木瓜河 源出山陰縣北水上村東流逕應州之
侯家嶺又東北至大營村入桑乾河

磨道河 河出小峪山口東流逕懷仁縣南十五
里又東南逕乾溝村又東北入應州界注桑乾

河

清水河 水出懷仁縣東南六十里之韭畦村東
南流逕應州北水磨村又南至臧家寨入桑乾

河 按入東洋河之清水河是另為一河

鹽鹹二河 水本無源納應州南山諸水自右注

桑乾河

里八庄河 源出懷仁縣西北十五里鷲毛口山
東流逕縣北八里庄名里八庄河東南逕應州
界入桑乾河

渾源河 即古噶川水也寧武府志源出今渾源
州東北二十里汗土峪今名神頭村循州城西
北流至應州界又折而北入桑乾今流逕州西

南十五里故崞縣麻家庄分流遼城西北匯為

大澤又西合神溪水水發源州北七里鳳凰山麓

按渾水有二一曰渾河上自渾源州義家寨

流逕應州大同界入桑乾一曰渾源河發源

本州恒山東峯之陰炭峙峪下遼城西北流

入應州界與渾河合流渾河所會之水極多

曰乳泉曰李峪水曰凌雲口水曰磁窑峽水

曰鸞嶺關水曰遠望峪水匯為大澤而西流

下游又有唐泉及大石口水北婁口水入之

大峪口河 即左雲縣之馬頭河也自吳家窑東

南流出大峪口逕懷仁縣南水磨寺村會宋家

庄河一曰紅山峪水東北逕應州大同界入桑乾河

如渾水 大同府志如渾水導源察哈爾正紅旂

遊牧之葫蘆海東南流入豐鎮廳北又南逕慈

老溝又東南逕新城河靈泉自左注之泉出豐鎮廳東

石元山麓又南逕河口灘行廳境凡五十餘里由鎮

羗邊牆水口南流入大同縣界又南逕孤山村

得勝河西來注之河即水經注之羊河也一名三台道河源出察哈爾正紅

拊遊牧地 逕豐鎮左得八墩口之水又南逕白

廳入得勝口故名 馬城又東南逕紫閣村西又南逕府東門外之

興雲橋亦名玉河金史地理志如渾水又折而

南逕獨覺岡又南合武周川水入桑乾河今名

十里河河源發塞外菱角海

五泉河 發源天鎮縣馬頭山南流至定安營會

倒回窩小廟灣金圪塔三泉折而東逕興隆堡

與蝦蟆泉合南會龍池堡之龍泉由顧家營鹽

水皂屈曲而西逕陽高縣之西坦坡大同縣之

康石庄復折而東入嘴兒圖以達桑乾河

石門溝水 發源天鎮縣三十里李芳山陰會于

五泉河

入直隸界後匯流諸水

柳園泉 水出西寧縣西北流逕縣南注桑乾河

西沙河 龍王河 二河皆泉水導源順聖東城

南注桑乾河

壺流河 明史作葫蘆河即古祁夷水也山西志

壺流河在廣寧縣南源出沙泉其形如壺故名

流逕縣南作曠河自左注之源出廣寧縣西山麓又南

枕頭河源出廣寧縣南翟家曠會直壺流河集興曠之

水源出廣靈縣南七里自右注之又東逕壺山下與壺泉

合即豐水也源出廣靈縣東南一里會莎泉同入壺流河

按壺流河又合滋水即神泉水扶桑泉七里

河會子河太平河一名安定河諸水亦一大

川也自是而下三洋河來會其流更大

三洋河

南洋河 即古雁門水明史地理志大同府陽高

縣有雁門山雁門水出焉雁門水即十里河由

開山口入繞城而東折而南入白登河即古擗水

大同縣東北七十八里聚落山南俗名河兒頭

東流逕陽高縣西南折而東逕河上堡以在古

白登縣南故自陽高縣雲門山北豐鎮界又東

入天鎮縣境又東得三沙水李沙袁沙陸沙三

折而北名十里河又東經永嘉堡入直隸懷安

縣柴溝堡西南又東合東洋河凡馬邑河源出

縣西北山明英國公張懋田車箱河發源天鎮

鑿石開渠東流逕萬錦灘圈玉泉西流匯為八里河天鎮縣南八里有井

池導入南洋河出泉匯而東流故名

涌泉河泉亦名海子泉水源出天鎮天潮河源出

天鎮縣西南孫家園北流入之蘭陵溝水朱家溝水蘭陵溝發

源天鎮縣東南十里泉眼數十隨地涌出北流

入山溝朱家溝發源天鎮縣東黑龍背麻黃楞

諸泉北之柳河河在懷安縣皆入焉

西洋河 即古延鄉水發源大同府豐鎮廳東太

僕牧地蒙古謂之葫蘆速太其水自七家營東

北流逕高嶺子東石嘴頭名頭道河東流逕天

鎮縣平遠水口石塘河北來注之源出豐鎮南

鎮縣揮門山北逕瓦又東逕平遠堡十家河北

流注之發源天鎮縣東北史又東逕西洋河堡

家窑諸泉北流匯注入懷安縣界渡口堡北注東洋河

東洋河 大同府志于延水一名修水即今東洋

河也由察哈爾正黃旗五祿戶灘發源南流逕

大青山又南逕黑土台屈而東逕碾房窑謂之

二道河又東入張家口與葛河合流南至懷安

縣柴溝堡西北匯西洋河

温涼泉 發源萬全縣西南五十里平地湧出冬
温夏凉故名

清水河 源出邊外自張家口流入即水經注之
甯川水也

拜察河 河在張家口北稍東六十里源出拜察
村逕桑阿蘓台山俗謂之古爾板河

西海子水 水在舊萬全左衛西無源滙聚衆山
水成澤

小清河水 水自葛峪堡西南流合小泉水逕宣
化府城西二里

泥河 即古黑城川水在宣化東十五里自關子
口西南流四十里注洋河一統志泥河在朔州
北東流入馬邑縣界入桑乾河言其上游也

燕尾河 形如燕尾故名

東礮山水 水出保安州東南八十里一名二郎
溝東北流入桑乾河

望聖山水 無源東流入桑乾河

媯河 一統志媯河自延慶州東北發源西流逕
州城南又西逕懷來縣南又西南流入桑乾河
本古清夷水也今媯河流至保安州東繞州南

一里西流合溪河

溪河 河出延慶州南團山之西南流逕永寧城西流入媯河即古滄河

大柳河 河源出懷安縣養鷺池

黑龍河 河源自保安州西佛峪山溫泉西南流逕黑龍廟渠故名

小清河 源發橫山西麓北流與葛峪堡小清河別為一流

小溪水 水合桑峪西溝水逕水碾口村南流

自石景山以下併為一河有分洩之壩無旁入之河

金門閘減河 在南岸二工十四號乾隆三年建每遇盛漲由此分洩經良鄉縣之韓家營涿州之北蔡南蔡宛平縣之長安城南至固安縣之米各庄畢家庄分東西二股皆渾河故道也其西股於乾隆十七年方宮保奏請堵塞僅存東股東股向由畢家庄逕永清霸州歸津水窪入淀嗣因黃家河淤塞乾隆十五年改由霸州舊

牝牛河歸中亭河自金門閘至入淀之處計長一百五十里

北村灰壩減河 在南岸三工十一號乾隆二十五年建下游至固安縣南柏村會入金門閘引河計長五十一里餘

求賢灰壩減河 在北岸三工四號起建於乾隆四年後經二十七年三十七年兩次改築初係草壩繼而改為灰壩循北岸歷宛平固安永清東安武清等縣境流入鳳河下游河流所過之處亦屢經遷易自毋猪泊泊在武清縣南三十里淤淺之後仍由遙捻舊減河計長一百五十餘里

唐河

唐河即滏水也水經注云逕唐縣故城故曰唐

河畿輔圖記滏水由唐縣西南過曲陽定州至

祁州合滋沙二水水經滏水東南過中山上曲

陽縣寰宇記滏水亦名唐河在定州北八里考

滏水發源山西之靈邱縣高氏山由倒馬關入

唐縣恒水西北來入之經縣屬北洛村居民引

以溉田有廣利渠

廣利渠金太和六年所開引唐水灌田數千畝又導而東

以溉隣邑明萬歷中知縣楊一桂復浚之建九閘以時蓄洩又於電水村架木為槽號為騰橋

凡濬渠七十里歷村落三十有八分析開渠二十有五溉田無算今開口傾廢惟北洛格尚有涵洞設涵洞十八以次引水官為督率毋庸踰越下流至釣魚台唐曲之民恒於此爭水利焉經曲陽之鎮里高門溉田尤多至定州城北清水河自北來會之考元和志唐河在慶都縣西南四十二里宋史河渠志景德元年北面都鈐轄閻承翰自嘉山東引唐河至定州北唐河入定之始乾隆五十九年河水異漲大溜南徙逼近定州北城垣墻幾為冲齧而故道遂淤北來之清水河自為一流不復入唐清水下流去路亦經淤塞以致清水村南北大道積水恒滿行人居民俱病之時有議開西世業村溝道洩由望都境出清苑縣黃龍港至張登入龍泉河之請而清苑之民以清水一來水患不絕利此害彼所議遂寢前者屢經查勘清水河源流甚旺惟迤東有民田數畝地勢尚低若由此導之東下勢可暢行無煩另闢一塗嗣因村民狃於地美價高不肯讓地與水以致旋議旋止嘉慶二

六等年夏秋盛漲唐水河槽漸成平地水來散漫不束唐水轉分流入清水河而清水河之水亦任意蕩軼其分流處仍由東西世業村居民私自開溝東洩下歸清苑張登之龍泉河夫張登為省南要道龍泉河身淺隘焉能容唐河清水河之流是唐河必得仍由故道疏治使之暢流清水河亦必得仍入唐河庶可為久遠之計水利所關非止一州一邑設去路艱於開挖而民田有工省可以通流之處不宜聽其護惜是當給以地價或易以腴田使河流得就其順下之勢庶驛路不致有阻而州城亦得鞏固矣自是而下至祁州三岔口與滋沙二水合下為潞龍河以唐河故道考之合流之後自蠡縣東高陽縣南溢入河間府肅寧縣境經河間循城西而北洋河自南來會之洋河經城西唐河經城東至城北合流北行至任邱縣界又號半截河北為相子口分支為鏡河繞城而北合於相子口北入於五官淀而肅寧復有中堡河在縣東北三十里則

饒陽五聖口分支者也。有白龍河則自下道口
分支者也。又肅寧舊有五河曰青口曰河邨曰

甘河曰灘頭曰海市皆唐水散入處與中堡通

流今並淤塞

明嘉靖十一年中丞許公宗魯濬唐洋二河後數十年上流壅塞每

水發南自蘇家口北自徐見口即徐家口環流
變入舟楫財貨日集輿梁橋左居民稱便知府
部相通其水於濠間昔所稱西關外大河者是
萬歷間自城南八里庄迄徐家口築堤亘二十
里名八里堤舊址尚在今八里庄尚有古橋通
南北驛路乾隆五十九年橋圯知縣徐曰言修
之并有復治唐洋二
河之議惜未果行

國朝以來唐挾沙滋二水由博野安平合蠡河潞

龍河至高陽安州入白洋淀而滹河支流向由

深冀饒陽安平入者故道亦湮河間境內唐洋

二河僅存故瀆乾隆五十九年大水瀛郡東南

積水萬頃居民皆哓哓於二河之不治如果循

元時通行故道寔力挑挖

元史滹河自博野東流至河間府分支繞

城而北復合東流五十餘里至市庄分為二一
自市庄西北十五里流經任邱分為二支繞城
而北復東北二十里至武濇淀一自市庄東北
流過東庄橋至武濇淀又合至猫兒灣舟楫可

通不特水道通而商賈可資舟楫之便抑且河

河渠濬而民田可無旱澇之虞惟汪中丞應蛟

所謂河間可用南方水田法得水田數萬頃恐唐河既已改流水田未必可行矣

謹按水經注及近世胡渭禹貢雖指合之輿地在宋時古滏水所行道猶不改自咸平中何承矩興塘泊以限契丹於是改引水道而文安之故瀆遂空其後滏水仍自蠡縣改流經肅寧河間雄縣任邱以至文安不復北行明時又自雄縣改流入霸州保定界今則自蠡縣改道此今昔情形之不同也

附入唐河諸水

恒水 俗謂之橫河源出曲陽縣西東流入唐縣界龍泉鎮東經十八渡與唐河合尚書正義恒水出常山曲陽縣東入滏水漢書地理志上曲陽恒山北谷禹貢恒水所出水經注滏水東過上曲陽恒水從西來注之自下滏水兼納恒川之通稱即禹貢所謂恒衛既從也

清水河 俗亦謂之唐河水經注盧奴城西北平地泉湧而出俗亦謂之唐水也東南至唐城西

北隅塌而為湖入滏水定州志北十里有唐水源自本州南宋村白龍泉東流而下合滏水以有清濁之故名為清水河

盧奴水 在定州北一名黑水池亦曰黑龍潭泉水經注盧奴城內西北隅有水淵而不流水色正黑俗名黑水池定州志俗謂黑水曰盧不流曰奴故漢置盧奴縣即今黑水泉也

狄水河 方輿紀要在曲陽縣東三里發源恒山南流至定州入滏水相傳宋將狄青治漕於此

因名

龍泉河 曲陽縣志激玉泉在縣北五十里平地湧出濫而南下轉折而東與滏水合即龍泉河也

馬溺水 在唐縣西水經注水出上曲陽城東北流注於滏

鴻上水 在唐縣西北水經注滏水東流鴻上關於是左納鴻上水水出近溪東流注於滏

灣里河 在唐縣西北四十里源出縣西北蔡庄

北山流經灣里長店至大洋社注於唐河

古洋河 上游為鐵燈竿口水為漳滹諸河分流

冀博間匯為汚池其支流經河間府城南通濟橋東北流至百姓橋北行通靜海直沽以達海舊時自蘇家口徐見口入滏河今鐵燈竿口久淤洋河僅有河形止消西南一帶並獻肅邊界瀝水

沙河 即汾河源出山西繁峙縣之白坡頭口流經阜城曲陽行唐新樂定州至祁州三岔口與

滏滋二水合

按沙河上游來源甚多在阜平縣東六十里發源太茂山南流者為平陽河在阜平縣東四十里發源本縣炭火舖東流者為班峪河源出山西靈邱縣逕阜平縣東者為鷓子河源出大派山在阜平縣東關外者為小河在阜平縣南十五里發源清竿嶺東流者為胭脂河因河水有紅色故名發源山西五台縣至阜平與胭脂河合者為當城河發源龍泉

關西八里之印鈔石山下逕阜平縣西者為
兆流河源出行唐縣西北武庄社北山者為
曲河又東流經賈庄村曰賈庄河皆入泃河
郃河 在行唐縣南一里源出縣西北兩嶺口山
谷間曰潁水南行三十里經箕山之東許由村
之南即所云洗耳溪也又東流曰郃河又東經
新樂縣界入泃河

甘泉河 在行唐縣西北三十五里源出甘泉廟
南流入郃河

滋河 一名潑河源出山西大同靈邱縣枚回山
流經靈壽行唐正定藁城無極深澤等縣至祁
州與滏河沙二水合元和志蔚州靈邱縣滋水出
縣西枚回山懸流五丈湍激之聲响動山谷明
一統志滋河源出蔚州枚回嶺經靈壽入行唐
之張茂村伏流不見至府境南孟社復出行唐
縣志滋河之源最多一出阜平白蛇嶺曰泃河
一出山西五台縣南山之南東流與泃河會一
出靈壽縣界北山五岳寨一出王母山北峪一

出王母山南峪俱至靈壽縣西北五河村五河
合流東注滋峪之東南又有西山之小河入焉
故名滋水東返行唐趨正定經藁城東北抵祁
州與沙合其過正定而東也又有浴河木刀溝
水入之浴河源出新樂縣中同村浴兒池一名
金水河木刀溝一名長淋溝元和志溝
旁人姓木名刀因名自閔泉鎮東南
流至赤堠村與浴河會同入滋河

按漢書地理志滋水出行唐縣東至新市即
入滹沱經流無幾元和志又謂源出靈邱其
來頗遠明一統志謂水至行唐而伏其流亦
微今行唐縣志又謂自縣而上匯集衆流即
成大川蓋源流變遷今昔異矣

漳河

漳水即禹貢之衡漳周官職方氏所稱冀州其
川漳是也其源有二清漳出山西平定州樂平
縣少山南過和順縣遼州又東南入河南涉縣
至交漳口會濁漳濁漳出山西潞安府長子縣
西發鳩山過長治縣又北至屯留潞城襄垣縣
又東過黎城平順縣又東入河南涉縣至交漳
口而會於清漳二水合流入直隸磁州境東至
講武城南山盡地平水始奔放漲漫水經云漳

水東至列入縣南又東北至斥漳縣又東北過
曲周縣又東北過鉅鹿縣又云東北過平舒縣
東入海跡其故道乃在今順德廣平二府之東
南境前明時即屢經遷徙正德間徙元城之間
家渡十餘年又徙魏縣之雙井村嘉靖初又徙
魏縣之回隆村旋徙內黃之石村萬歷二年漳
河北溢由魏縣肥鄉入曲周之滏陽河而館陶
之流遂絕至

國朝順治九年復自廣平縣杜村經元城縣賈家

庄達廣平之平固店分為二支一支東行入衛
一支北行至山東邱縣又分為二支一折而東

經威縣南宮棗強武邑景州阜城交河至青縣

出鮑家嘴與運河會曰老漳河

乾隆二十九年開引河導流北

行塞鮑家嘴開

一折而西經廣宗平鄉鉅鹿抵寧津會

滏陽河至冀州合滹沱河東注曰新漳河

俗呼曰小

漳考其自成安威縣東抵山東館陶縣入衛遺

跡長一百二十餘里漳水不經者一百二十四

載至康熙三十六年六月漳水驟至館陶與衛

河會嗣是二支之流漸微五十四年議以衛河水弱復於館陶築隄逼全漳之水以濟運滹滏

既無漳水之助而老漳亦遂絕矣由館陶入衛者自廣平經

魏縣亦分新舊二渠至元城而東注按漳河遷徙無定故道亦紛

不可悉數歷代以來決徙不常或亂於河通典

橫流入或塞於衛元史河渠志漳水潰至明則

挾滏陽而北徙明外史河渠志漳水自永樂九年與滏陽河合流是也

本朝則併滹沱而東溢禹貢錐指滹於順治二年從冀州合於漳水是也

渾濼駭浪迄無一定而要其經流有三由臨漳

邯鄲歷永年曲周鉅鹿北合滏者為北道由大

名魏縣合衛河者為南道由肥鄉廣平北歷冀

州河間天津諸屬者為中道禹貢所載北道也

水經所序中道也今由廣平大名入館陶之流

則南道也北道地高南道地卑故漳愈北則患

愈輕愈南則患愈重前明迄今潰決頻聞而魏

縣尤首受其害乾隆二十二年漳河突決橫堤

水入魏縣城城中民出者半未出者登樓巔坊

脊樹抄以待救廬舍悉沒積淤丈餘屋盡沒頂

制府方官保奏請併魏縣入大名縣移治於府城今漳流已安流數十年而思患預防治於已然則難治於未然則易此職司河務者所宜巡觀無間以時修築耳

入漳諸水附

小漳 源出山西和順縣八賦嶺南流入清漳

石猴嶺水 出山西和順縣東流入清漳

清河 在山西和順縣會清漳東流

淘清河 發源山西長治縣

石子河 在山西壺關縣西東南流合于漳

龍泗河 雍水 二水俱出山西長子縣分流

入濁漳

洺水 在山西屯留縣南禹貢錐指發源屯留

下亂漳

蘭水 亦出屯留縣下與洺水會流

丹朱嶺水 自山西高平縣西北流逕縣城南

入濁漳

沙河 在大名府城東北四十里方輿紀要河

南北長二十里東西濶二里許流常不竭亦名流沙河下流合於漳水

張甲河 前漢地理志冀州清河信城縣張甲

河首受屯氏別河東北至蓐入漳水 信城今屬廣平

府清河縣

衛河

衛河發源河南衛輝府輝縣蘓門山府治係古

衛州因以得名東流經新鄉汲縣又東北由濬

縣內黃入直魏縣故城南東經大名故城南龍

王廟又東北至大名府城東又東北入山東館

陶縣之南館陶會於漳又東北至臨清州板闌

迤北會合山東汶水入會通河 即今南運河 一名白

溝亦名未濟渠亦名御河禹貢錐指即古之清

河水經云淇水魏武自枋頭過其水為白溝隋

煬帝導為永濟渠一名御河今稱衛河者也衛水會淇湯洹諸水其來源莫遠於淇而水亦莫

大於淇土人因其流經衛州衛縣今廢在衛輝府東北城

下遂呼為衛河間有知其為白溝或以御河呼

之者絕不復知其為淇水矣譬之大江之源來

自貴州因禹貢導江自岷山遂以岷山為江源

不復知其發自黔省矣衛水利益艘通漕運河南

免漕向在小灘鎮今在內黃之楚旺安流不驚自與漳合流亦復

泛濫頻告明嘉靖隆慶年間決大名縣境國朝雍正初漳水勢甚截衛河口水

常倒瀉乾隆二十二年十月十六日荀隄工之

不固元大之民未可安枕卧也是在地方有司

慎其歲修毋庸另為籌辦耳

附入衛諸水

淇水 源出河南彰德府林縣西山東南流過

淇縣界又東南至濬縣淇門鎮合衛

宛水 宛水上承淇水於元甫城西故五水合

流世謂五穴口今通并為二一水注淇為天

井溝一水經五車分為蓼溝入白祠陂

湯水 在河南湯陰縣南東北流至內黃縣會
洹水注於衛河

洹水 一名安陽河出洹山至林縣屢伏屢見
水經洹水出上党泫民縣唐宋以前洹水皆
東北流經大名故城西其地為宋時洹水縣故墟至明徙
流東南由安陽內黃合湯水

濟水 發源河南濟源縣王屋山下曰沘水既
見而伏復出於縣東書禹貢導沘水東流而
為濟傳泉源為沘沘出為濟東北流會於汶

汶水 水經汶水出泰山萊蕪縣原山西南至
壽張縣至安民亭入於濟明史河渠志汶河
有二小汶河出新泰宮山下大汶河出泰安
仙臺嶺南又出萊蕪原山陰與縣界寨子村
俱至靜封鎮合流遶徂徠山陽而小汶來會
經寧陽北堽城西南流百餘里至汶上北又
西流抵東平南又北流至東阿又東北流五
百餘里入於海此汶水故道也元初畢輔國
始於堽城左汶水陰作一斗門遏汶入沘於

是有南入泗淮之派而猶未分於北至元中始分流入濟水又由壽張至臨清通漳御入海

按沂州亦有汶河一出蒙山東澗谷一出沂水南山谷合沂水俱入邳州河明洪武中寧陽汶河決南運滋陽西至汶上水高出河丈餘永樂中會通河成宋禮絕濟引汶築壩戴村遏令出南旺分水蓋南旺勢高如人脊然一從左臂向南一從右臂而北南距濟寧九十里合沂泗以濟故分四流北距臨清三百餘里獨汶水無他可濟故分六流自前明迄今漕運賴之

邦畿水利集說目錄

卷之四

白河 獨石水 紅山水 龍門川 揚田河

陽樂河 舊鹵水 大谷水 九泉水 光

谷水 乾溪水 鵲谷水 高峯水 溪水

溫泉 富河 牛家務河 潮河 駱駝港河

沙河 雙塔河 幢幢水 大水峪河 馮

家渡河 白馬關河 雁溪河 小泉河 七

渡河 清河 凉水河 芹城水 曲水泉

通惠河 玉河 潮河 黃門子河 乾搭河

黑城川 三藏川 道人溪

蘄運河 鮑邱河 窩頭河 洵河 如河

小河 馬莊河 獨樂河 周村河 逆流河

沽河 陽河 砂河 龍池河 淋河 十

河 清水河 冷嘴頭河 興龍口河 小泉

河 孟家泉 采亭橋河 柳沽河 湯河

魏家河 龍堂灣 泥河

溲水 雙城河 韓城鎮河 沙流河

灤河 澱河 恒河 長河 清河 要孤水

漆河 別故河 淘金河 青龍河 白洋

河 溫河 白溝河 暖泉河

沙河 石河 大小水泊 海子長灣 王家

河

清河 沂河 古懂河 大田泊

陟河 龍灣河 唐家河 官渠河 泉水河

石溜河

洋河 松流河

渝河

陌河

飲馬河

附總論
急工
緩工

邦畿水利集說卷四

元和沈聯芳叢山編輯

京東諸水

謹按京東諸水自雍正初年 怡賢親王奏勘
修濬後乾隆二十八九年方恪敏查辦水利獨
京東並無工程今閱七十餘年河道變遷淤塞
之處不一而足而寶坻頻年尤多水患治之亦
不可或緩矣

白河 古沽水也亦曰潞河源出宣化府赤城縣

流經口外入密雲縣石塘嶺關過密雲縣西又南逕懷柔縣東又南逕順義縣東又南逕通州北又屈逕其東南又逕香河縣西南折而東南入武清縣界又東南達天津府之三岔口歸海河入海此今日經行之道也漢書地理志漁陽沽水出塞外東南至泉州入海行七百五十里方輿紀要白河源出宣化府龍門所東滴水崖東流入密雲縣之石塘嶺過縣西入通州界其支流亦從石塘嶺過懷柔縣西順義縣東入通

州東境合馬東經漵縣武清東而入直沽明一統志白河自密雲縣與潮河合流至通州入直沽一名白遜河按白河兩岸皆白沙不生青草故名一曰白河自石塘嶺白馬關入故曰白河又以其逕潞縣又名潞河見水經注密雲縣境有石子壩一道嘉慶六年大水冲壞應修復其舊

又考白河上源發於赤城縣其在宣化府謂之沽河其源有二一曰獨石水由獨石口逕獨石

城西為西河一曰紅山水由紅石山逕獨石城東為東河俱流至城南而合又南逕龍門山下名龍門川又南逕雲川堡東又南逕縣東門外又南逕龍門所南曰揚田河又南與陽樂河合為南河又東南經滴水崖堡南亦曰白河又南逕延慶州靜安堡又東至東河口由邊外達順天府密雲縣之石塘嶺關至通州為白河水經注沽河出禦爨鎮西北九十里丹花嶺下西南流出山逕漁陽故城西

考明史河渠志通濟河即白河也源出塞地經密雲縣霧靈山為潮河而富河習口河七渡河桑乾河三里河俱會於此名曰白河南流經通州合通惠及榆潭諸河亦名潞河三百六十里至直沽會衛河入海秦始皇輓粟北河唐明皇運青萊粟浮海給幽并兵宋時通運關南俱資其利明漕尤賴焉

白河在宣府會流諸水

獨石水 在開平衛南源出東山

紅山水 在開平衛東源出紅石山

二水合流俱逕雲州堡入龍門川見方輿紀

要

龍門川 明一統志龍門川在雲州堡東合獨石

紅山之水從龍門峽南下故名

揚田河 宣鎮志河經龍門所城南二十里

陽樂河 即古陽樂水也東流至赤城縣界入沽

河水經注陽樂水出且居縣東北流逕大駟山

小駟山北歷女祈縣故城南世謂之橫水又謂

之陽曲河又東南逕一故亭又東左與舊鹵水

合又東南逕旁狼山南又東南逕溫泉東又逕

赤城西屈經其城南東南入赤城河

舊鹵水 即龍門河也水經注水出西北山東南

流逕舊鹵城北又東南流注陽樂水

大谷水 水發禦燧鎮北大谷谿南流逕獨石北

界注於沽

九泉水 水導北川左右翼注入共成一水故有

九泉之稱南流注大谷水

光谷水 源出禦爨鎮城東北光谿西南流逕鎮城東又西南流注大谷水

乾溪水 水引北川西南逕一故亭東又西南注沽水

鵲谷水 赤城河之下游也東南流合高峯水

高峯水 水出高峯戍東南西南流入沽水

溪水 在延慶州東西海冶堡北門外水有三源一出堡西南昌平州黃花路界東北流經堡西至堡北有數源自西北來流合焉一出堡南東

北流經堡東北與西水合又東北流三里出邊外入沽

溫泉 在西寧縣東順聖東城東二里又保安州東三十里亦有溫泉水經注橋山下有溫泉石池吐出能治百疾北流入溫水

白河入密雲石塘嶺後會流諸水

富河 即古濕餘水也一名溫餘河亦曰榆河方輿紀要濕餘河源出京都山至舊縣而伏又東復出謂之榆河其發處為月兒灣或名溫餘河

今上流已涸下流為沙河入順義縣境至通州會白河水經注溫餘水出上谷居庸關東又東流過軍都縣南又東流過薊縣北又北屈東南至狐奴縣西入于直沽河通州舊志富河在州城北源出宛平甕山口自昌平白羊口入經榆河下流為沙河至州城入潞河而畿輔通志謂其源出昌平州未知孰是

牛家務河 一名絳河源出牛欄山經西趙村過絳橋至王家渡入潞河

漸河 在通州南自蘆溝分流至廢漸縣西折為三股其一為漸河東入白河

駱駝港河 名勝志駱駝港源自三河縣之負兒山流經香河縣北入白河

沙河 昌平州山水記沙河店南有水出昌平州西南五十里龍泉寺合西山諸泉東流為南沙河店北有水出昌平州西南四家庄逕雙塔村東流為北沙河二水至店東南寶家庄而合又東南至通州界入白河

雙塔河 元史河渠志雙塔河源出昌平縣孟村一畝泉經雙塔店而東至豐善村入榆河又陽峪河在昌平州西亦名陽峪川源出石絳山下東南流入雙塔河

幢幢水 在昌平州西北虎峪山下飛瀑如布流二三里至鵜鴿岩隱流不見或云舊治西北城下虎眼泉是其復出處流入榆河

大水峪河 在順義縣北二十五里自懷柔縣流入東南流至牛欄山東麓入白河

馮家渡河 在密雲縣九十里源出口外自馮家峪口流入白河

白馬關河 在密雲縣北一百里源出口外自白馬關口東流入縣界折入白河

雁溪河 在懷柔縣東八里源出塞外自開連口入界南流經大水峪河入白河

小泉河 在懷柔縣東三里源出虹山由采家里入白河

七渡河 水經注七渡河出北山黃頌谷亦謂之

黃頌水東南流注沽河懷柔縣志七渡河在縣南二里即昌平州之珍珠泉也南流入縣界至城東南入大水峪河

清河 在宛平縣西北山水記土城關北十二里為清河其水出玉泉山分流而北逕此又會于沙河入于白河

凉水河 畿輔通志謂其發源宛平縣水頭庄東南流入海子內經馬駒橋至張家灣曰南新河東入白河恭讀乾隆三十八年

御

製重修馬駒橋碑記詳示凉水河源內云水自南苑出者二其南源曰團河其北源曰一畝泉出新衙門北屈曲東南流逕二閘凉水河自北來會之凉水河者出右安門西南鳳泉東流逕萬泉寺分為二其一南逕草橋曲折東注一自北逕廣恩寺曲折東注至水勝橋復滙為一東南流循南苑繚垣而東至小紅門之西入苑墻東南逕沙底橋折而南與一畝泉合又南而東至鹿圈村三海子以上之水自西南來注之又東南

流穿苑垣而出逶迤至張家灣入運河按此則涼水河亦一巨流也

芹城水 在昌平州東北二十五里水經注芹城水出北山芹城東又南注于濕餘水

曲水泉 在順義縣東北二十五里泉水湧出南流入白河

以上諸水俱入白河

通惠河 亦名大通河源出昌平州白浮村神山泉西南會一畝泉馬眼諸水又經宛平縣玉泉山東繞甕山匯為七里灤東入都城西水門貫積水潭又東從月橋入

內府南出玉河橋水門合南北城河經大通橋至通州分流一自舊城西水門流入城內至東水門出繞城南流至南浦閘瀉水至張家灣入運河其土壩運漕至中西二倉水道即由此一自舊城西水關分流至北門外葫蘆河是為石壩又從滾水壩瀉入運河其石壩運漕至京倉水道即由此一自新城西門外繞新舊城南門出

南浦閘與東水關繞城南流之水會入運河元

史河渠志世祖至元二十八年都水監郭守敬

建言疏鑿通惠河上自昌平縣白浮村引神山

泉西折南轉過雙塔榆河一畝玉泉諸水至西

門入都城南匯為積水潭積水潭即西海子燕都遊覽志積水潭在

都城西北隅東西亘二里南北半之西山諸泉從高粱橋流入北水關匯此或因內多植蓮名

蓮花池或因水陽有淨業寺名淨業湖從德勝門橋東下稍折而南直環北安門宮牆左右流

入禁城為太液池俗呼海子套東南出文明門東至通州高麗

庄入白河總長一百六十四里一百四步工成

賜名通惠明世宗實錄嘉靖六年十月巡倉御

史吳仲言通州運河元郭守敬創建已有明效

今通流等八閘遺跡尚存原設官夫具在因而

成之為力甚易請以臣言下戶部定議上命戶

部侍郎王軌工部侍郎何紹及仲董其事軌等

言通流閘經二水門南浦上橋廣利三閘皆衝

市闐闐不便轉運從温泥河濱舊小河廢堰西

不一里至堰水小壩令通普濟閘則徑易可省

四閘兩關轉搬之難從之

玉河 卽金水河也源出宛平縣玉泉山滙為西湖分流入德勝門西水關逕海子入大內從金水橋流經玉河橋出正陽門東水關至東便門東水關出注通惠河

潮河 古鮑邱水也源出古興州自密雲縣古北口流逕縣西合于白河水經注鮑邱水出禦彝北塞中又南逕密雲戍西禦彝北塞今廢興州地密雲戍卽古北口關也水經注又云鮑邱水西南歷狐奴縣又西南注于沽河今順義縣漢狐奴地也

謹按方輿紀要舊日潮河自密雲逕順義縣而合于白河又分流由三河寶坻而合于洵河統而計之密雲之潮河卽寶坻之潮河今蘄運支分名異總一鮑邱水也明嘉靖三十四年遏潮河不使入順義竟由密雲合白河又水部備考自密雲城西楊家庄築塞新口疏通舊道令白河與潮河合流至牛欄山水勢甚大故通州漕運得達密雲城下是潮河

之在密雲者合白河而下達于通州即今所云北運河也

黃門子河 在密雲縣東九十里源出黃花關口泉西流入潮河

乾搭河 在密雲縣東北百四十里源出口外自黑峪關流入西流經古北城內會清水河又西南入潮河

黑城川 在密雲縣北四十里平頂山後流入潮河

三藏川 一名三城水在密雲縣東北其水分三派曰西藏川東藏川中藏川中合處曰三藏口下流入于潮河

道人溪 在密雲縣東北石盤谷發源龍門流入潮河

以上諸水俱入密雲縣之潮河其入寶坻縣潮河諸流歸附薊運河後

薊運河 一名潮河即密雲縣潮河之分流由三河寶坻至寧河入海畿輔通志謂其源出遷安

三台營會遵化薊州諸山泉之水蓋來源甚繁
沙河沽河洵河淋河黃頌諸水皆會焉洵京東
一大川也方輿紀要寶坻縣潮河一名白龍港
其上源一自黎河一自洵河至縣界三叉口合
流亦曰運糧河東南入于海寶坻縣志潮河在
縣東二十里會洵河沽河東南至縣東九十里
名豐臺河亦名懷襄河共南流過梁城所蘆台
抵北塘口入海明景泰二年由北塘河口開引
新渠由是天津糧艘由直沽逕
寶坻縣之潮河而上沂考薊運河源出遷安縣
于薊州故謂之運糧河

三台營會遵化諸山泉之水俗名沙河逕遵化
州城南西南流至張七各庄折向西流逕水門
口湯泉自西北來入之又西南入薊州東界淋
河合興龍口之水自北來會焉又西南至南河
庄薊州北山諸泉水來入之逕城南五里橋迤
逕西南流逕上倉折向南流至下倉折向西流
至嘴頭村洵河合周村黃頌等河自西北來會
之至白龍港入寶坻界淤泥河自西南來入之
折向東南流逕新安鎮至小河口小泉河合藍

泉水自北來入之逕曹家口頭折而南至于家

口頭迤逦西南流至大沽庄復折而東南至王

家庄又折而西逕長亭店復折而南徑八門城

畿輔通志八門城河在寶坻縣東七十里潮水逆注受其灌溉者有七十二沽居民利之迤

逕東南流至盛家庄還鄉河北支自東北來會

又東南至江潢口還鄉河南支自東北來入之

逕梁城所北分流環城仍合于城南又東南逕

蘆台軍糧城會天津新河入海新河在寶坻縣東南自直沽河

口起至北塘河口止長四十里明天順三年鑿

謹按薊運河受十餘河之水源多派繁每當

汛發寶坻地最窪下首受其害自 怡賢親

王奏請自三河縣料馬庄起至寶坻縣之江

潢口一百八十餘里間起築長隄永為保障

復于魯沽庄建石閘一座長亭莊張頭窩各

建涵洞一座民享其利數十年于茲矣今自

甲寅以至辛酉八年之中水患頻仍非舊制

之不善實水道今昔異形矣自宜另為相度

用前人之成法就今日之地圖變通裁制寶

抵濱海不遠治之非難是在任用得人耳

鮑邱河 源出密雲北逕三河縣之夏店東南水經

注鮑邱水又東南入夏澤日知錄今三河縣西有夏店疑因古夏澤為名今夏店有箭杆河即

其地徑虎將庄入寶坻界考潮河本名鮑邱水也方輿紀要鮑邱河逕

三河縣界至寶坻縣合洵河為舊日潮河分流按此則怡賢親王所挖鮑邱河亦潮河故道

也東逕縣北齊河務蕭家壑東南至王補庄與

窩頭河會過林亭張家庄至周家庄東南逕尹

家庄又東由八門城入薊運河

窩頭河 即蒼頭河一統志在香河縣西北二十

里上通牛欄山水窩頭庄水下通三路隄口一

由李家圈坑隄口入北吳村一由明星堂抵口

入廿十八隄口一由東凌莊尹家河沙務庄張

家灰店南吳村牛家屯入板簷口運河按此河

相傳為蕭后運糧河水本無源伏秋汛發衆流

會于窩頭經香河縣吳村百家灣東與渠水合

流東逕七里庄入寶坻縣界東過城南之西石

橋至王補庄與鮑邱河會

謹按通州烟郊以南之水皆滙于窩頭河本

有二股一股南入運一股東達寶坻 怡賢
親王奏請將南股疏通深暢俾八分歸運河
分入吳村者無多而七里庄一帶惟時已難
開鑿然考香河縣東北舊有蒲冶河流貫縣
城出東門流十八里名牛家港又二十里滙
為七里庄河東逕寶坻縣界入海蒲冶乃獨
自入海之河其經流處溝槽必深總有淤積
不至費工濬而通之亦為下必因川澤之意
也

以上二水會流入薊運河

洵河 源出口外流入平谷縣又東北逕三河縣
東北折而東至寶坻縣會潮河入海亦曰渠河
水經注洵水出右北平無終縣西山白楊谷西
北流逕平谷縣屈西南流又東南逕平谷故城
東又南逕絳城東又東逕臨河城北屈而歷其
城東側南出入鮑邱水方輿紀要洵水一名廣
漢川發源黃崖口西南流經盤山之陰入平谷
縣為洵河又南入三河縣又東南流入寶坻縣

界

如河 方輿紀要如河源出密雲縣石峩山流逕平谷縣東南流入三河縣東南入洵河 按今石峩山隸懷柔縣山中並無泉源惟石峩山南不十里太保庄西山下出泉流逕平谷三河或即如河源也

小河 在三河縣北十五里源出靈山西流入洵河

馬莊河 在平谷縣東三里源出縣東北海子庄

南流入縣之洵河

獨樂河 在平谷縣東北二十里或伏或見斷續不常西流入洵河

周村河 源出口外流至平谷縣西十里入洵河
逆流河 一名小碾河在平谷縣南八里源出泉水山西流九十九曲入洵河

沽河 即淋河之下流也西南流與洵河合而為白龍港方輿紀要薊州沽河自陽河以西洵河以東諸水皆會焉志云沽河在通州者為西潞

水在薊州者為東潞水薊州志沽河東接遵化
玉田交界處至州南紀家窩而南行至下倉店
轉而西南行至嘴頭庄與洵河合流轉而東南
行由白龍港至曹家口頭庄

陽河 在薊州西五里亦名五里河源出州北蘆
兒嶺口南入沽水水性暖遇寒不冰故名

砂河 在薊州西二十五里源出盤山經沙嶺之
麓東南入五里河

龍池河 一名漁水源出薊州北之鶩臺下潄為

鶩湖南流經州城西又東南入沽河

淋河 即梨河遵化州志梨河經州西南與諸水
合名合河一名張子河入薊州界為沽河薊州

志淋河源出遵化州合陽河清水河流至淋河
庄入境東南流至夏官屯合沽河此河本名梨河因淋梨二

字音相似今
遂悞為淋河

十河 源出口外合衆流而南經遵化州東又西
南入梨河

清水河 在遵化州西六里源出導溝峪經州西

南入水門口又西入張子河

冷頭嘴河 在遵化州西北二十五里入張子河

興龍口河 在遵化州西北六十三里天臺水所

匯流也南流入張子河

小泉河 在玉田縣東北源出小泉山經城東孟

家泉達城南光沙泉

光沙泉一名煖泉在玉田縣南三里泉湧沙出淨細

光明土人取以攻玉亦見寰宇通志而南匯為一河入寶坻縣白

龍港名勝志小泉山在玉田縣東二十五里上

有泉出石罅西南流入白龍港

孟家泉 在玉田縣東五里自小泉至孟家泉僅

數里凡一百二十餘折而達鴉鴻橋入薊運河

以上諸水皆會于洵沽淋諸河入薊運河

采亭橋河 即古藍水也亦名藍泉在玉田縣西

二十里有采亭橋源出縣東北三樂台山西南

流會螺山寺泉南流至寶坻入潮河水經注藍

水出北山東屈而南流經無終故城東燕山麓

錄玉田縣西北有水其水蔚藍可愛曰藍水其

土如靛蓄靛者恒取土和靛賣之

柳沽河 方輿紀要柳沽河在寶坻縣東北三十里玉田縣之水匯流入縣境曰柳沽河下流注于白龍港

湯河 在密雲縣東北七十里源出司馬台關口泉南流西折貫古北營城中西出又南入潮河魏家河 在遵化州西北五十里源出鮎魚關流入湯河

龍堂灣 泥河 二河俱在豐潤縣南西流入薊運河

漚水 即古唐水也燕山叢談凡水皆自西而東

此水獨西俗謂之還鄉河方輿紀要漚水一名

還鄉河或謂之雲漚水方輿紀要玉田縣廣源水即豐潤之漚水

出遷安縣泉莊一作莊黃山之麓至岩兒口入豐

潤之東北界又西逕五峯頭至韓家厓頭迤邐西南流至窪谷村折而南逕東馬莊又折而西逕豐潤城北迤邐西南流至張官屯入玉田縣之東南界又西南至蠻子營沙河自北來入之逕鴉鴻橋至運河頭復折而南自此河身頓

狹斗折蛇行至趙官屯分為二股一西南流逕
橡子莊牛兒頭至盛家莊入薊運河一南流逕
九丈窩豐台鎮至江漢口入薊運河水部備考
明初用遮洋船從直沽入海轉餉薊州天順二
年開直沽河歲久復湮嘉靖四十五年詔濬豐
潤縣還鄉河轉運太平等寨軍餉于北齊莊張
官屯鴉鴻橋特設三閘以潴水焉

按漕水源竣流紆向有九曲三灣之稱數為
豐玉害康熙四十二年決運河頭奪流而西
至雍正元年始塞決口 怡賢親王于劉欽
莊王木匠莊迂曲處各開直河一道由是分
洩多塗久無冲決之患然堤堰殘缺河中弩
嘴淤沙到處皆是是在有司實力疏濬凡其
潰而為害者皆可因而為利也

雙城河 在玉田縣東二十五里源出常山旁無
堤堰每泛濫為害明萬歷中縣令葉重第嘗濬
渠引入還鄉河

韓城鎮河 在豐潤縣南五十里韓城鎮源出車

軸山流逕鎮北又西流會還鄉河

沙流河 在豐潤縣四十里源出縣北五十里之

党峪山下流逕兩山口又西南至姑嫂橋合還

鄉河

以上三河均入漚水

漚河 即古濡水也源出宣化府炭山東北流逕

古北口邊外又東南流至順天府遵化州由團

亭塞入遷安縣境又東南逕盧龍縣南又東南

逕灤州東又東南逕樂亭縣西又南入于海漢

書地理志漁陽郡白檀濡水出北遼西郡肥如

濡水南入海陽

按白檀之濡即肥如之濡顏師古漢書注以肥如之濡音乃官

反白檀之濡音呼賜反世遂疑其為二及考水經濡水篇鄰注引白檀之濡甚明非有二也

水經注濡水二源雙引夾山西北流出山合成

一川東南入安州界逕漁陽白檀縣故城又東

南逕盧龍塞又東南流逕令支故城東自孤竹

城東南逕主鄉北又逕牧城南分二水北水枝

出世謂之小濡水東逕樂安亭北東南入海濡

水東南流逕樂安亭南東與新河故瀆合又東

南至象縣碣石山南入海元史河渠志灤河源
出金蓮川中由松亭關北逕迂安東平州西瀕
灤州入海也方輿紀要灤河源出宣化府西百
二十里之炭山東北流逕雲州堡北六十里馬
營堡南二十餘里又北流經故桓州南入舊開
平衛境東南流古北口邊外小興州東又東南
與九流河及諸山水合勢始大由遵化東北團
亭塞入內地經永平府迂安縣至府西又經灤
州東至樂亭縣南入于海

謹按灤河導源宣府下達樂亭千里而遙其
下游徃徃不雨而水驟至灤州偏涼汀以下
西樂亭東昌黎兩岸舊有隄岸邇年殘缺日
久水至輒為田廬害然距海不遠水去亦速
故百姓于隄防不甚加意苟其勤加培築事
省而功倍何憚而久不為此又考明李實北
使錄灤水濶不盈丈而中甚深其色青綠土
人呼為商都以今河考之莫詳于宋琬永平
府志今節錄于後灤水于開平界東流七百

里為九流河此其西北道也逶迤而東有柳

河自西來入之

柳河即遼史所云自松亭趨柳河者在遵化州北口外

灤河又東寬河自都山以西來入之寬河水產金沙

一名豹河流百里入灤都山在迂安又東南縣北百里元史亦謂之烏都山也

過潘家口鐵門關水注之鐵門關水源出口外自鐵門關入口

又西出喜峯又東入團亭塞口內地矣又東口而入于灤

南逕桃源莊與澈河合又東至中峯山與恒

河合又東過唐山與長河合又東至官寨與

清河合又東過黃台山之箕石去迂安縣三

里納要孤水灤河至此其勢愈大每夏秋水

盛波濤澎湃渺若江湖又南入盧龍縣界又

南出其縣西過清節廟即夷齊廟又南至虎頭口

與漆河合俗傳為漢李廣射虎處又南至偏

涼汀入灤州界與橫河合偏涼汀南去州五

里其地山環水繞林木森爽無風自涼故名

灤河又南逕巖山石橋與別故河合又南五

十里至岳婆婆港入樂亭縣界東岐為二左

曰胡盧河由縣東界南流入海今淤右曰定

流河由縣西北至劉家墩入海二水青黑而
灤河清碧入海五十里不溷是為綠洋溝土
人亦謂強河

入灤河諸水附

澈河 在迂安縣西北一百六十里源出口外由
龍井關流入至縣西漢兒莊南東注灤河永平
府志澈河之源正一旁二一曰黑水自龍井關
口外七十里喬家嶺河多石溢涸有常發于半
嶺由三台關南入一曰橫水南自洪山舊關嶺

西從三道嶺雨溢則深二丈廣倍之晴則廣不
過丈深尺合關北出口外孤石西入澈其正源
自黃崖陰過大安山後黃門子二百餘里會橫
水而入龍井關合黑水過漢兒莊繞釣台北至
桃源莊入灤

恒河 亦曰橫河在迂安縣西北一百里永平府
志恒河源出三屯城西景山王四家峪流達城
北而東三百里會山麓諸流廣二丈深數尺至
迂安中峯西與灤合

長河 在迂安縣西北九十里永平府志灤過唐山合長河河自口外聶門龍鬚三岔入董家口而東下及青山關營合駐操營南太平營西二十里為下稔子口入灤河

清河 在迂安縣西北七十里有二源一出大嶺

寨西二里之溫泉一出口外之水湖洞至城子

嶺合流而入口逕太平寨合蛤螺河

蛤螺河即口外之乾

河川亦由城子嶺而東與清河合流

過長峯嶺至官寨下入灤

要孤水

在迂安東三里亦曰三里河源出迂安

北小寨南逕要孤山麓南至盧溝堡注灤

漆河 源出口外土人亦呼為烏填河入桃林關

鹿尾山諸水會之又南經燕河營合青龍河又

南經盧龍縣西又南至虎頭石與灤河合永平

府志漆水源從境外十八盤北早落兀素百五

十里阿老谷泉至蔡家谷合下二百三十里為

三岔口又二十里土人呼為烏填河入桃林關

鹿尾山諸流會之南行之峯山西注于燕河按

漆河即古元水也水經注元水出肥如東北元

溪西南流右合盧水肥如故城在盧龍北地界
桃林關元溪即府志所云鹿尾山諸水也盧水
即青龍白洋二河桑欽所云盧水二渠大沮小
沮合而入元者也漢書地理志肥如盧水南入
元水元水東入濡今青龍白洋入漆漆又入灤
則漆之為元無疑

別故河 在灤州西南其源有四一出縣西北二
里廂兒山東逕柏樹莊高家坎至演武亭此正
流也一自演武亭東北逕蓮花池是為金魚泉

一自菜豆灣過巖山而下是為玉帶河一自劉
官營而東是為五里河四流胥會于演武亭西
堰而為別故河經巖山石塘下合于灤河查是
河逼近城垣年久淤塞雍正四年 怡賢親王
奏請疏通舊道不惟城堙不受浸噬西南負郭
之田皆資浸潤之利

淘金河 在盧龍縣西南源出筆架山東北諸山
谷中西流入灤河其水產金地名沙金廠

青龍河 一曰涼河即古盧水之小沮也源出都

山東由冷口關流入逕迂安縣建昌營南與白
洋河會又南逕盧龍西南入于漆盧龍縣以此
得名水經注小沮水發冷溪世謂之冷池又南
得溫泉水口注之又南流與大沮水合而為盧
水也永平府志謂涼河者乃青龍源從都山東
南龍王廟豹崖之三岔又二十里合寺兜崖三
溫泉十里入冷口關冬暖夏涼謂之冷池至建
昌營南六里為峯山青龍過而下至孤竹故城
之陰中流有石為砥柱焉

白洋河 在迂安縣東北四十里即大沮水也源
出白洋口流逕石門堡至建昌營南合青龍河
水經注盧水出肥如縣東北沮溪謂之大沮又
西南小沮水注之合為盧水入于元

按青龍入口而為冷池正鄰道元所云小沮
水發冷溪者也白洋入口而繞石門即鄰道
元所云水出沮溪謂之大沮者也青龍以出
冷溪故兼涼河之稱漆水以合青龍故又兼
攝青龍之號近志竟以青龍為漆水而以白

洋為小沮于是求所謂大沮而不得遂以盧龍東南之白溝當之悞甚

溫河 源出部落嶺西南流入漆即古溫水也俗曰肥如水水經注溫水出肥如城北西流注于元永平府志城北十二里溫泉曰肥如水初由上水關入城中行繞出下水關注漆數經水患乃塞上關堤水由城外西行南流入漆

白溝河 即古陽樂水也在盧龍縣東南十五里西流入青龍河水經注陽樂水出東北陽樂縣西南入于沮水謂之陽口永平府志古陽樂縣東北陽山出泉曰白溝過大石如槽俗謂之驢槽其西南為陽口

暖泉河 即古溫泉水也在迂安縣東北五十里源出劉家口西有泉三湧出如瀑布并流為河至徐流營南入青龍河水經注溫泉水東北溫溪自溪西南流入小沮水永平府志劉家關西之暖河過徐流營北溫泉長流可稻 按此乃迂安之溫泉非盧龍之溫水不可混而為一

以上諸水皆會而入灤河

沙河 在迂安縣西北四十里源出縣西北橫山之赤崖永平府志橫山在迂安縣西北五十里其下寺曰赤崖泉突出而南為沙河經好樹村東流至松谷莊合沙河過七家嶺至院頭與王家河合至新莊東草子屯下合衆流經沙河驛至灤州西四十里海子崖莊長灣入之大小水洎經孫家溝永登屯入之經柳林莊自宜安社迤邐而南至北柳河社經豐潤越支社界轉東南達于海

石河 在迂安縣西三十里源出縣西北橫山之

血石嶺東流入沙河

會合之處地名劉全莊

永平府志橫

山前為血石嶺石色如之有泉清冽可掬冬草青花白雖嚴凜不槁為石河之源河多石故名

按永平府有二石河其一在撫寧縣東源出口外流經石門寨又東至山海關合南北二關河至南海口入海此則在迂安入沙河以入海

大水泊 在灤州西南七十里源出土山任郎莊
流逕赤墩社曰漢王渠南播為小水泊又逕孫
家溝永登屯合沙河

海子長灣 在灤州四十里產菱芡魚蝦下流入
沙河

王家河 在灤州西一百二十里源出曹家口社
會沙河達海

以上諸水皆入沙河

清河 在灤州南二十里相傳為秦漢以來漕運

故道發源州西五子山東五里有大泉騰沸流
逕州南八里曰八里河又經料馬台邱官營伏
入地中俗名地橋又東南二里經閻家莊復現
為龍溪亂泉突湧分為二派一出南閘頭東南
行一百三十里經樂亭西南馬頭營達綠洋溝
入海是為西清河一經龍堂寺其水清可鑑亦
名清水河又西南經破橋又西合沂河折而西
南至沙溝又六里至澤頭合古懂河又西南經
高家莊合大田泊又南至公安橋又西南四十

五里至蚕河口入海

沂河 在灤州有大小二沂河即古素水也水經注素水出今支縣之藍山南合新河又東南入海灤州志大沂河在州西十八里源發盧龍縣馬家莊經栗園折而南經三岔院折而西轉佛住山南經楊家院合董家灣又東南經芹菜山波落橋又南合蓬台港又東南經于家泊入青河又有小沂河在州西十二里發源烽火山東流經拐頭過雙山入大沂

古懂河 在灤州南四十里源出倭城南流經石橋入青河

大田泊 在灤州之南獨莫城南雖旱不竭流入青河

以上諸水俱匯青河入海

陝河 在灤州西一百二十里其上源曰館水

紀要作源出迂安縣館山南經羅家嶺小龍皂

角二灣又經梯子嶺至偏山臨水院又合黃花港入牯牛橋為牯牛河又西南至榛子鎮東南

會龍灣河又西會唐家河而至州西八十五里
之雙橋會板橋水即豐潤之泉水河也又南經
石城為石榴河又南經唐山橋名大河又南與
帥家河合為官渠河入海自石城以南灤州與
豐潤分界陟河在豐
潤縣南三十
十五里

龍灣河

在灤州西北九十里發源羅家嶺南三

里南經皂角灣梯子嶺亦名黃崖河至榛子鎮

東五里橋合煖泉入牝牛橋河

煖泉在州
西九十里

唐家河

在榛子鎮西源出狼窩鋪崖下東流逕

冷家灣南入牝牛橋河

官渠河

陟河帥家河下流也帥家河源出灤州

西六十里白雲山南之水峪西南經孩兒屯官
套至石城東又西南為小河又西南與陟河合
而為官渠河又西南由豐潤縣南入灤州境達
于海

泉水河

源出豐潤縣東北水頭山有泉二泓噴

出如珠南經王官營達于板橋有灤州之圍山
瀑布水自松梁社來滙為板橋河又南逕峰山

入陝河

石溜河 獅子灣在灤州西七十里滹沱靚碧東流為石溜河會于陝河

以上諸水俱會陝河入海

洋河 一名陽河在迂安縣西里許源出界嶺口外裂地山流經縣東南紫荆山下入海

松流河 在撫寧縣西北十二里源出奴望東山中流經背陰舖至石河莊入洋河

渝河 在撫寧縣二十里源出口外逕縣東北偏

頂山之平臺合鮒馬寨前水東南入于海方輿紀要渝河源出塞外古瑞州境東南流至連峰

山西一名獅子河出菱茨蒲魚為民利亦名泥蒲河又南入于海水經注臨渝有渝水首受白狼水東入塞外又有侯水北入渝

陷河 在灤州南五十里源出州西南五十里於家泊會破風港于倂城西其北十里為龍堂河源自李家庄流為七里港又北十里為吳家河源自青河又有繩家河源自榆子林社遊觀莊

羣流胥會倭城而與隋河合經曲王店孫家坨
至王塚港瀰漫于白沙坨南又經胡家莊至印
步甸別為周家河又西經梁魚溝南經天井達
蚕叢口而入海

飲馬河 在昌黎縣南五十里源出盧龍縣界谿

谷中流經縣西安山下又東流為沙河至縣西

十八里合深紅河又東南流至縣南八里有紅

橋跨其上金人所置也又南合潮河此潮河在昌黎縣南

二十五里亦名馬家河下歸
七里海非密雲之潮河也

昌黎縣境南有深紅河安山河梭頭河繞灣河
俱入飲馬河

謹按直隸河道源流惟京東諸水別為一途其餘自覃懷以北太行恒山以東數千里之水羣趨赴

京師之南會於直沽以入渤海昔汪應蛟有言易水可溉金臺唐水可溉中山滏水可溉襄國滹沱可溉恒山漳水可溉鄴下近代以來薊永豐玉津霸等處營成水田並有成效使盡因其利而利之畿南不皆為沃野乎然利之所在即害之所伏其在

聖祖

世宗年間淀池深廣未墾之地甚多故當日王河督新

命怡賢親王查辦興利之處居多迨乾隆二

十八九年間制府方恪敏時除害與興利參半

今則惟求除害矣水非加多地非加少果能求

其致病之處而力為除之利之所興安見今不

如古哉顧以今日全局大勢籌之其中極難者

有四

一永定河自建隄以後新雄固霸一帶永慶安

恬惟隄內流沙易積隄埝亦屢經改築考康

熙三十九年之河在今南岸之西西老隄之

東雍正四年之河自五工至永清縣冰窖村

西轉而東至王慶地入三角淀今之舊南北

隄是也乾隆十五年冰窖草壩改河則又由

雍正年間之南隄出口循康熙三十九年之

東老隄東入葉淀乾隆二十年于北岸六工

二十號改下口則又開雍正四年之北隄放

水東行今自順水壩以下雍正四年之舊南

北隄猶存而河身皆成淤地矣自六工以下凡有窪下堪以行水之處俱已變為高原舊隄遙捨之間業已無路可為導引為今之計惟有用陳觀察儀仍復南行故道一說較為得地蓋永定河舊由看丹口逕固安縣至霸州入會同河今金門閘減水引河即其故道昔以無隄而受衝決之患今若束以長隄導之南注藉清流以刷濁水仿江南蓄清敵黃之法雖不能保其久而不變然五十年之間安瀾可必矣

一東淀滙畿南全局之水有翕受停蓄之用今日就淤淺非人力所能開挖兼之三角淀葉淀沙家淀俱經闢積無可分瀦惟與南北西運奪三岔一門以入海此邇年泛漲之所由來也陳觀察謂清水無路歸津必至側注楊柳青一帶穿運而過繼未必盡然而水壅必潰津門實有堪虞今若于靜海縣權家口北縣三里添挖減河一道俾三岔口少洩一分南

運之水即多洩一分東淀之水况該處減河
雍正年間 怡賢親王業經奏准因冲决之
路而因勢利導旋以積水而止在昔日開之
為南運分減之法在今日用之即為讓流東
淀之計不特與淀有益即與運河亦屬有裨
變而思通實不得已之補救也權家口既開
再將淀池葦草鳩集人船大加鏟芟使水中
根葉淨盡自無掛淤之病然後再謀用船撈
泥如陳觀察所云設游船募奴夫可以斟酌
變通行之誠今日治淀之要着也

一滄陽河弱不敵濬苟非急為調劑濬沱必將
南徙查濬沱得治水之助勢益兇悍其先滄
陽之不受倒灌者賴有小漳河之助耳自康
熙三十六年漳水南由館陶入衛滄陽無助
弱不敵強然其先北泊寬深尚能容蓄自乾
隆五十九年以後北泊淤平大半濬沱頻决
東隄其不至東淹新冀者幾希矣今若于上
游塞治河入濬沱之路俾循故道各自經流

合波助溢以敵滹此萬全之策惟治河故道
逕由欒趙境內隄埵橋座必須另為改建所
費浩繁此亦前人舊有之議非敢創說也

一文安居九河之下稍素稱水鄉歷來籌議河
防如王鳳靈姜揚武井濟博紀汝清諸公俱
熟悉川源兼權利害而迄無良策以為長久
之圖嘉慶六年大水之後長隄蕩決居民皆
以任其通流不復以築隄為事夫當水壅未
退之時自宜留其去路以為宣洩迨水已消

退自當仍舊築隄以防外水之入從前初築
隄時大窪左近取土較難適年隄根日就高
積南水不來自然漸露灘地培築較易何憚
而不為為今之計治文安之水施工不必盡
在文安境內一開通勝芳舊河使水由東趨
再于上游開中亭河以分其冲突之勢一修
復廣安橫隄長城老隄以禦河間北流之水

一修築烹耳灣橫隄以防西水

橫隄坐落雄
保二縣南自

雄境小王東村起北頂保定縣千里長隄計
長三千一百九十七丈為文安西障禦五官

淀泛漲之水、五官淀上承唐洋二河之流、向有王村閘宣洩、今王村閘已改築土壩而五官淀又淤滿不能容水、故橫隄尤易潰決、橫隄既修、宜并王村閘修復其舊、庶橫隄可保穩固、如是則西南兩路無來水而大隄之外水分勢緩、即遇澇年、總不能保其無水而區區本邑積潦所淹、無多、不此之務而欲任其蕩漾、莫圖受淤營田、何計之左歟、又考康熙三十三年徐司馬元禹摺、篆文邑有立圍田製水車、量水盈縮、導引出入、議于保定境內立閘引水、以防旱于縣境龍堂灣、建閘洩水、以防澇、嗣以阻于保定、未果行、而徐司馬亦不久去、後遂無踵其議者、以今地勢論之、龍堂灣為文邑至窪之處、通縣之水俱可由此歸淀、若仿照徐司馬原議、于該處建閘二座、以時啓閉、復為立圍田製水車、實力行之、何患不成樂土耶、

青滄減河仍宜改閘

謹按捷地興濟兩減河自 怡賢親王奏請建設五洞減水石閘各一座、至乾隆三十六年、

高宗純皇帝巡幸山東舟經閘口見運河底水寬裕恐
閘壻有所壅蔽

諭令改閘為壩並將龍骨海漫落低一尺有奇三十餘
年來暢流無阻仰維

睿慮精詳固宜永遵弗替惟是運河河底邇年日漸增
淤壩口漸形低矮渾流所過如龍骨高則泥沙
澄於下而不致旁流其淤減河也輕龍骨低則
雖遇小汛而泥沙悉行灌注汛期一過淤積至
於數尺故雖有歲修而淤多費少挑挖焉能盡
淨此減河之所以日就淺窄也籌議者總緣從
前改壩出自

高宗聖裁未敢輕議更張但今昔情形迥乎不同倘蒙
據實陳奏上荷

聖明鑒察因時制宜或可仰邀

俞允俾青滄減河兩壩仍准改為閘座遇大汛則啟
放洩水水弱則閉板以濟運歲修既可節費而
減河不致頻淤實於河道民生均有裨益

再查減河歷年久遠河身淤積迨滿舊日河

槽原寬八丈今僅存三四五丈不等河底較之隄外高有丈許今欲從隄內開挖用力難而需費大若導從隄外行水南行則築南隄北行則築北隄就一面現有之隄不過築隄一面其需費較省於開挖舊河河槽既深行水倍暢可收分洩之實濟惟以事關改作不敢妄議存其說以俟將來

濁水不宜分流

治水之道合則猛分則弱惟濁水不宜分流而或者執禹疏九河之說以為辯論夫九河至近海之處正資去路之速雖多疏之而不為病若上游則異是竊見漳水在廣平邱縣境內分流四出頻見遷徙自歸併館陶合為一流遂安流順軌滹沱有完固口鐵燈竿之分支故其流不久而旋淤今僅存臧家橋一派衡武河獻境內不聞淤塞下至大城張家莊以下分為正支二派今正流已淤而支流亦淺澀豈非明驗乎雖然分流之說亦有不可偏廢之處如子牙新河

開自康熙四十一年

聖祖仁皇帝親臨查閱建有減水石壩間嘗親至其地

相度形勢壩門龍骨甚高惟盛漲可以過水並

非分流以入新河也又天津紅橋一帶舊為子

牙入運故道西有隔淀疊道東建木橋數座盛

漲之時各橋均令洩水

隔淀疊道工成諸此又橋下均宜開通

下游不妨分流之謂也總之入海之處不嫌多

塗上游之流不宜分道是在治之者相其宜而

用之耳

河間不宜水田

直隸水田之興自宋何矩置斗門以引水溉田

其後踵而行之者在元則有虞集脫脫在明則

有徐貞卿汪應蛟張國彥顧養謙左光斗諸人

我

國朝 怡賢親王奏請設立營田專官以經理其

事凡畿疆可以興利之處靡不濬流圩岸遍獲

豐饒獨何以不及河間在昔汪應蛟云瀛海當

衆河下流視江南澤國不異若建閘通渠可得

水田數萬頃其說本於徐貞明貞明亦本於元
虞集 國朝李相國光地亦曾上言河間宜興
水田未得請而止論者謂河間其壤墳而踈且
多河瘠圩田之法未可施用其說固當而要其
水田之可營不可營不係乎是夫圩田築隄皆
頻煩人力農之惰者雖置之荆揚宜稻之鄉溝洫
不能以時修濬猶獲石田安能多稔如果終歲
勤動鼓舞力作何患不成沃土所慮今昔水道
不同耳河間舊為唐河下游又有滹沱支流經
其地源流不絕可以引而灌故元明之間羣主
可興水田之說迨明季

國初唐滹之流漸弱故雖有建議旋即中止今二
河並皆改流不由河間河境既無恒流藝稻自
非所宜即唐洋二河開挖深通亦只為西南一
帶瀝水宣洩之道春水無源水田無藉非特地
土有異宜實時候有異用也

津靜運河西岸宜設隄防

南運河兩岸均有大隄獨西岸自獨流鎮以北

至天津郡城向止有商人捐築小埝高不過三尺自乾隆初年天津張觀察坦熊創不可築隄之議良以運河遇盛漲正賴此無隄之岸聽其洩入淀池免致漫溢耳桂林陳相國宏謀為監司時正接張觀察之手謂是為運河天然滾水大壩因而仍之且為之說以宣示不可築隄之故前哲經畫之善識遠慮周承承堪師法獨是當日之洩運入淀其時淀池深廣是以停蓄翕受津城既無冲突之慮運隄亦免泛溢之患是當

日固必不可有隄也今淀池淤積迨滿西來之水已難容納水漲則東漫歸運以故嘉慶六年淀水穿運而過靜邑東隄亦被冲刷數處不惟不受淀池容蓄之益反受淀池橫決之害自宜有以障之使淀自淀而運自運各不相入乃可保漕艘經行之道然亦必得添樵家口減河廢運河方免漲溢且必得修復隔淀疊道庶淀水不能東漫此數處工程缺一不舉不能有濟也計自獨流至楊柳青四十里自楊柳青至天津

三十五里皆當接築大隄此亦今昔情形不同之處也

疏天津七閘引河分洩海河盛漲

海河綿長一百二十里俟廣崖深潮汐迎之則逆行而上即禹貢所謂逆河也南岸有疊道舊設七閘視水盈虛以時啟閉原以洩南窪之水入海河歸海今海河河底日漸高仰南窪地勢反低即遇海河水弱之時窪水亦不能入河以故天津城南瀦水恒滿海光一寺宛在水中查

七閘之下向俱有行水溝十餘道今並淤積若尋其故道均加開濬以白塘口與鹹水沽舊河為經流導之東行由中堂窪一帶分洩海河盛漲是海河得此七閘三岔口自不致十分壅滯亦分減之法也惟七閘既開南窪之南必得有隄埝擋禦方不致於南軼波及青靜也或以開溝之土培成兩隄各束成河啟放之時閘板不宜盡撤盡撤恐溝道窄狹不能容也

開溝疊道

古人溝洫之制縱橫相承淺深相受水漲則以
疏洩為灌輸水消則以挑濬為糞治立法本善
無地不宜然亦視其土性之宜否耳 前制府
胡宮傳勸民挑挖池塘開溝疊道又置造水車
教民運用而其法卒不能行者何也畿輔土踈
善崩開挖雖成一遇雨水旋即塌陷水車亦以
岸高水深艱於轉運惟開溝疊道大有益於行
旅惜行之未久而宮傳逝世地方有司遂無實
力繼行者夫開溝疊道非祇為疊道計也地之

與河相近者水之赴壑自易其距河較遠之區
向非有溝涂以傳送之其停瀦之處雖一隅亦
能阻隔為患故為疊道而開溝而所開之溝亦
必相度地勢使溝水有所宣洩而後能收溝之
益是開溝實水利中所不可少之事今試以疊
道工程計之最亟莫如安肅縣南北獻縣單家
橋南鄭州迤北景州城北等處果能尋其去路
引水導流俾脈絡通行受其益者豈僅在商旅
哉

淀泊淤地不宜耕種

畿輔地方平行河道縱橫入海之處惟海河一門全賴大澤以容蓄衆流傳遞歸海計畿內大澤有六曰大陸澤曰寧晉泊曰西淀曰東淀曰塌河淀曰七里海皆能收束衆流緩其奔突之勢實水道之關鍵衆流之綱領也川無澤不止澤無川不行二者相為表裡講求水利者當以此為先務矣邇者北泊為滹沱淤塞大半漸成平陸東淀受渾河子牙之淤水廣而淺塌河淀七里海為民佔種西淀中多圩田甚或以報懇弁科地方有司受其所惑殊不知阻遏水道其咎綦重惟是積重難返園圩耕種之地未能悉行除去是不可不詳查如有實在阻塞水道之處宜亟為鏟挖永行禁止乃為有益

畿輔地方廣濶河道縱橫應修之處指不勝屈
既不可枝枝節節治之致有上通下塞顧此失
彼之病然同時並舉工作浩繁經理亦慮難周
自應分別緩急次第興修謹將應修各工分列
於後

急工

廓清東淀撈淤并芟刈葦根水草
添權家口減河以分入海之勢
修復紅橋以西隔淀疊道

三
牙河為中

修十
修二條
修二條

開挖子牙正支二河并濬新河 四 子牙為

疏子牙河故道并三支黑龍港 五

開勝芳中亭二河 六 東院為

開河間唐洋二河 七 子牙為

定州唐河疏歸故道

塞冶河入濬之路以助濬 八 又濬河為

開清苑滿城境內金線河

疏挖趙北口迤東清河口一帶河道 九 所為

修趙北口十二連橋并除西淀中圩田 十二 西院為

修千里長隄并隔淀隄烹耳灣橫隄廣安橫隄

長城老隄賈口橫隄 十三

築滄陽河東隄 十四

文安縣龍堂灣建閘 十五

緩工

涿州巨馬河 十六 西院為

良霸北牛河

雄縣趙橋新立二村隄工

曹河并達省支流

瀑河并上游隄工

新安大澱澱旁二溝

濬七里海塌河等淀淤積

運河

猪龍河間段裁灣取直

疏通景阜一帶宣洩瀝水各河

大名境內漳河

薊運河

還鄉河

海河疊道并閘七座

天津砲臺七座

按天津為畿南衆水朝宗之

所地勢既低而海潮復來蕩激故前人起建

七星以鎮之

內鎮水者五鎮火者一鎮煞者一

實為水口吉

星有關通省風水非祇天津一郡也水利既

興宜並修之故附載於末

九十九淀考序

水經注邕奴東極於海謂之邕奴數其澤野有
九十九澱按玉篇淺水為淀取水定之義故通
作淀畿輔西北多山東南地方平行大瀆之自
西北來者如永定潮白巨馬諸水源遠流長夏
秋漲發勢若建瓴而滄漳滹沱又滙南郡數十
河之水來會群導於海河一門入海向非有淀
池為之容納將見暴漲奔騰泛濫為患矣是以
古之治畿輔之水者必自淀始淀廓而後河有

所歸甚矣。淀為功大矣哉。有翕受之量。有停蓄之益。有魚鱉蝦蟹菱芡萑葦之利。淀雖淺而地則廣。廣故能散。淀既多則勢可分。分即不猛。故其來也無盈滿之虞。其去也無奔突之患。天造地設。洵衆水之尾閘。

神京之淵沼也。然而陵遷谷變。水壅沙停。昔之所為洪澤。今有漸為田疇者。昔之所為巨浸。今有已成涓流者。古淀之存十無三四矣。噫。桑田滄海。昨是今非。况易遷善於如永定。滹沱諸水。渾

流所過。有不漸增淤墊者乎。以今淀言之。最著莫如東淀、西淀、三角淀、白洋淀。皆包并諸小淀。控連數邑。汪洋浩瀚。欲求一一區別之難矣。又考唐志云。鄭州有九十九淀。鄭州今屬任邱。其地勢本極窪下。縣誌所載淀名頗多。然以一邑之地。其諸水能有幾何。况諸淀碁布星羅。散於邦畿諸郡。地極廣遠。唐志所載。蓋指淀水滙聚之處而言。非謂九十九淀盡在鄭州也。即鄴道元所云。雍奴野有九十九淀。亦豈盡在雍奴哉。

不揣固陋考之圖籍按其方位凡淀之廣袤大小存湮通塞有所稽核者悉就所知作九十九淀考惟是淀名不一或古有今無或古無今有或一淀而今昔異名或一淀而分見數州縣求其何者為古淀何者為今淀非若河道之有可參考何敢妄為臆斷故所考得一百二十餘淀其中之分見而有確據者已歸并一條其餘並存之以俟博雅君子釐而正之

嘉慶庚申十有一月吳趨沈聯芳謹識

九十九淀考

元和沈聯芳葢山編輯

三角淀

在武清縣南八十里名筍溝一名葦洵即古雍奴水也周圍二百里方輿紀要其源曰范甕口王慶坨河掘河越深河劉道口河魚兒里河諸水皆聚於此東會直沽入海一統志古惟三角淀最大又當西沽之上故諸水皆會入於此今漸淤而小新志三角淀合相近諸淀洎總謂之

東淀云

琅川淀

在東安縣南七十里白溝諸水下流也東入磨

叉港

金盞兒淀

在通州北二十五里廣袤三頃水上有花如金

盞因名

不老淀

在三河縣西四里

東游香淀

一名香油淀在寶坻縣南八十里當北城河下

游與鯽魚淀相毗連

沙家淀

在武清縣南五十里西至敖子嘴東至陳家嘴

南至二光北至永定河慶北坨長約十里寬約

八里永定河水之所潴也乾隆十九年方恪敏

奏請於北岸六工洪字二十號掃工之尾閘開

堤放水就近堤窪處順勢挑引河一道至五道

口東南導歸沙家淀仍由鳳河轉輸入大清河
朱家淀

距武清縣五十餘里在沙家淀之東南西連沙
家沙淀東至鳳河南至九道溝北至龐家庄長寬
約八里亦為容納永定河水之區

葉家淀

在武清縣東南六十里半入天津縣境西北接
朱家淀東南連鳳河寬廣五六里乾隆十五年
永定河改移下口循南捨入此淀由鳳河達大

清河

曹家淀

在鳳河東堤之西葉淀東南南至韓家樹西北
至雙口約長十五里寬三四里不等為鳳河下
游受永定渾流今漸淤為平地

漂流淀

東安縣志鳳河在縣東北四十里鳳窩村其水
自縣西北草橋來又南流過縣之漂流淀

草頭沽淀

神堂兒淀

二淀俱在寶坻縣南二百五十里

尋思淀

在寶坻縣東南四十里

小淀

在寶坻縣東南三十里

塌河淀

一名大河淀北運河分減之水由筐兒港注之藉以蓄洩一統志在天津縣東北四十里周百

里按此淀上無來源下通潮汐以陳家溝賈家沽二河為出納焉南北廣十五六里東西長二十餘里東南有小河一道出西堤頭逕城兒上入七里海乾隆二十九年方恪敏奏請挑濬舊志或隸武清縣或隸寶坻縣蓋一淀而跨二邑也

鯽魚淀

青角淀

二淀與七里海相近在北運減河下游

月河淀

在寶坻縣東南九十里

破淀

在寶坻縣東北五里

趙淀

在寶坻縣東北五里又考太平寰宇記滹沱河
舊經文安縣西北三十里又東溢為趙淀按此
當另有一趙淀也

地扒拉淀

在寶坻縣東北二里

蘇淀

在寶坻縣西十五里考河間府志任邱縣梁家
庄亦有蘇淀今淤

蘓子淀

在寶坻縣西十八里

商王淀

在寶坻縣西三十里

水紋淀

在霸州東

得勝淀

下光淀

李子淀

大蘭淀

小蘭淀

五淀與水紋淀相接宋史河渠志沿邊塘樂東起信安軍永濟渠西至霸州莫金口合水紋淀得勝淀下光淀李子淀大蘭淀小蘭淀為一水

衡廣七十里縱十五里皆巨泊也

高橋淀

在霸州東南七十里一名大浪淀周圍百里其西為栲栳圈衆流所聚也東南流為柳汭河入文爾淀

文爾淀

在霸州東七十里舊名堂二淀東分二流形如八字亦名八字河下流俱入呂公河

迴淀

在霸州東南北寬八里東西寬二十七里

火燒淀

在文安縣東二十五里李家庄南廣四十餘里
東北有石溝河柳河急河三河聚流於此東入
衛河達於直沽又黃龍港自鎖井口開鑿至文
安縣玳瑁口以通涿水經火燒淀轉流入海今
淤為民田在千里長堤之右

石城淀

在文安縣東北四十八里

牛台淀

在文安縣東文安縣志貢士胡來聘補議余兩
任學博世居牛台淀南岸當大亭橋水口之衝

白龍淀

慈老淀

黑母淀

落坡淀

四角淀

五淀皆在文安縣東北

漠漠淀

在文安縣左各庄之東石溝之西

三家淀

在大城縣東北五十里為文安靜海三縣之交
文大之水由此北下明萬厯中靜海民築堤障
水文大兩縣俱被水害縣令梁綱請於撫按開
之畿輔通志王家口村東南岸有古河一道名
三家淀河緣本堤出瓦子頭橋下迤邐東北與
新河合新河康熙三十九年開在廣福樓之焦

家口

李家淀

在大城縣北十里

麻窪淀

在大城縣北四十里跨文安境文安縣志麻窪
淀在司吉城南

荷花淀

畿輔通志在保定縣西北中多種蓮夏月盛開
香聞十里又載雄縣西南十里有蓮花淀新安

高陽諸水所匯也舊時任邱滋沙滹諸水漲溢亦入此淀方恪敏疏稱蓮花淀在新安境又河間府志蓮花泊即荷花淀在任邱縣南三里舊志稱其有荷香十里柳陰交匝按保定雄縣新安任邱四縣均係接壤犬牙交錯淀跨四邑荷花蓮花之名二而一者也

糧料淀

在保定縣西北

棗林淀

在薊州西今三河縣東薊州西有棗林庄疑即此地

長春淀

在灤州西南一百二十里長春社金史地理志石城有長春淀舊名大定淀大定三十年更泡皮淀

畿輔通志橫河源出盧龍縣獨子山南逕橫山營又東至泡皮淀經榆山後至灤州偏涼汀合灤水

海子淀

在新城縣東三十五里受紫泉斗門西窪之水
舊有小溝䟽淀東注淺狹易淤

黑洋淀

在新城縣東南五十里

陽城淀

在望都縣東南今湮水經注博水出慶都縣其
流旋伏旋見經陽城縣散為澤渚世謂之陽城
淀注於唐河

馬務淀

亦名馬草淀在雄縣東三十里

蒼耳淀

綠鬚淀

蒲淀

太平寰宇紀瀛洲間大蒲淀下引水經注逸文
云大蒲下導陂溝競奔咸注滹沱是以人因決
入之處謂之百道口按古瀛洲地甚寬廣今雄
縣任邱之交窪下沮如疑即古大蒲淀

三淀皆在雄縣境見保定府志

柴禾淀

一名柴伙淀在雄縣東南十里白溝長流高陽諸河胥匯於此

石臼淀

與蓮花淀相近

留通淀

在雄縣西十里

燒車淀

在雄縣西十餘里方恪敏疏有東西燒車二淀隸新安縣即此

臺河淀

在雄縣北

襄子淀

在雄縣北傍新城邊界

五官淀

舊名武盭淀在雄縣南任邱縣東北舊時缺燈竿之水由此而東入柴河淀今湮

高家港淀

在雄縣見方恪敏奏疏

劉家淀

在安州西二十里石橋一畝諸水所匯也北接

依城河

菱子淀

在安州東三十里匯唐滋沙三河分流入白洋

淀

蓼淀

在安州境

大滂淀

在高陽縣東馬家河所潴也周圍二十里保定

府志作大潦淀在牛蹄窪之東

延福淀

在高陽縣西南十里接蠡縣界

馬棚淀

在高陽縣東北宋監馬棚牧地一云即顓頊洗

馬池

羅漢淀

在高陽縣境

白洋淀

九河所匯在新安縣南二十里周六十餘里南
高陽西安州東任邱北新安廣控四州縣而新
安十數村居其中輿圖白洋淀安州高陽任邱
新安諸水俱匯流於此下達四角河方恪敏疏
入則分東西白洋二淀

襍淀

在新安縣西五里按舊志襍淀為雹河蘆草灣
水所瀦蘆草灣乃九河外水其水更猛於九河
蓋九河有道可循此則四散瀰漫也畿輔通志
曲逆水一畝泉龍泉河至安州善馬廟與徐河
合流為依城河入襍淀

杜家淀

在新安縣南

鴨圈淀

楊家淀

王家淀

三淀在新安縣東皆與白洋淀相通

勞家淀

蔡家淀

梁古淀

落烟淀

考河間府志有落網淀與諸淀毗連絕謂之西淀其為相傳之誤無疑烟網二字未知孰是四淀均在新安縣境見方恪敏奏疏

大澱淀

在新安縣西北五里即古大渥澱也水經注渥水上承二陂於容城縣東南謂之大渥澱小渥澱水南流注易水謂之渥同口雍正四年疏渠洩水營田數千頃為膏腴之地

殷家淀

即小渥澱也在新安縣東三里按保定府志大渥澱小渥澱俱隸容城縣

大麥淀

小麦淀

二淀在新安縣境見方恪敏疏

狼兒淀

舊志定興縣西南五十里閻臺之西有狼兒淀地形窪下卽山之水渚焉蓋卽古鹽臺陂

邊吳淀

在安州西南卽邊家泊也今湮方輿紀要邊吳泊亦曰邊吳淀九河合流溢而為泊城南舊有邊吳塔又有古堤在州城東北東至邊吳村而下接雄縣南自板橋而下接蠡縣皆以防九河之決溢今廢

五千淀

在肅寧縣東南三十里舊志滋沙澗之水舊自蠡縣引流而東歷肅寧之五千淀而達於雄縣之瓦濟河中堡玉帶二河皆其經流處也

洋東淀

與五千淀相連畿輔通志在肅寧縣東南三十里舊為缺燈竿諸水散流所滙今湮考肅寧東

南隅有馬窪周圍可二三十里疑即五千洋東

二淀也

凡察淀

在任邱縣西北三十里

前堂淀

後堂淀

二淀俱在任邱縣西北四十里方恪敏奏疏則

稱前堂在新安後堂在任邱堂一作塘河間府

志作潭

北花淀

在任邱縣西北四十二里

池魚淀

絲窩淀

二淀俱在任邱縣西北五十里

光淀

在任邱縣西北五十里

龍王淀

在任邱縣西北六十里

三許淀

在任邱縣東北十三里今淤

掘鯉淀

俗名掘柳在任邱縣北寰宇記掘鯉淀在鄭州北二十里俗名掘柳淀左思吳都賦掘鯉之淀

狐狸淀

在任邱縣西北寰宇記淀中有蒲柳多葭葦按畿輔通志文安亦載狐狸淀考其方位是一淀而跨兩邑也

王家港淀

河洛淀

興隆淀

虎皮淀

將水淀

平陽淀

六淀均在任邱見方恪敏奏疏

居龍淀

在任邱縣北

胡蘆淀

在任邱縣司馬庄西金人詩胡蘆淀上八千家

金波淀

在任邱香城屯西

柳圈淀

花草淀

二淀俱在任邱市庄南

八角淀

荒萎淀

二淀俱在任邱東庄

黑耳淀

在任邱河口庄

大連淀

在滄州齊乘滄州南有大連澱寰宇記清池縣
舊有大連澱後魏延興二年澱水泛溢破件清
村因瀦為池水澄味鹹未嘗枯涸

李漉淀

在滄州唐書地理志清池西五十里有李漉淀

淀東有隄永徽三年築

南淀

畿輔通志清河在青縣西南五十里其相近又有湛河泗河共三河皆無源為交河縣雨潦洩水之渠北至杖河口南二十里魚兒庄注於南淀今土人謂之魚兒窪雖旱不涸

邱淀

南皮縣志在縣東北四十里俗呼為蔡家窪凡河口水出皆聚此東洩

布裏淀

在高陽縣東二十里舊志馬家河在縣東即蠡縣楊村下流也上承滹滋沙三水舊自蠡縣東入河間明正德中自蠡縣決入縣界緒為淀故又曰布裏河

麦子淀

乾隆二十九年方恪敏奏興水利其北運減河北股由麦子淀會塌河淀水於西堤頭引河其地當在寶坻南天津東北

淮魚淀

在七里海東南為減河入薊運海河之道乾隆二十九年奏請開挖

紀家淀

在勝芳河西其上即會仝河之汊口也

勝芳淀

即勝芳河文安縣志井濟博條議濬漳二水溢河間東之古鹽河經大城東南又折而東北衝子牙舊河亂流而趨於文安之勝芳淀乾隆十

九年秋永定河下口漫刷東老堤水歸勝芳舊淀

信安淀

畿輔通志永定河下流入淀之後水渙泥停一於而南信安勝芳等淀變為高原復淤而北策城新張諸泊墊為平地

天井淀

畿輔通志天井澤一名天井淀在定州境今湮又寰宇記水經注泝水歷天井澤南水流所播

為澤俗名天井淀

治縣西去天井淀一里天井淀在縣西

天井淀

如陳飛龍所製高平水

供而南對是地長平水高平水

高平水

高平水

高平水

高平水





